

**Nwa' wvu fwe wvu**  
**Bitá**  
**Fiε fi nu ê Nwa' Bitá wvu fwe**  
**wvun e**

Nwa' Bitá wvu fwe wvun nu ε wvú to sanj fô bonyii bo Klistu le bò to nu ε saan̄ken gen no cee mondvuum e jεεy jεεy (1:1). Fiε fi baay fi to geε é wvú sε sanj nwa' wvun to nu keetefe bonyii ban no bonyii to bone bikaa ê bó εjim e, ε bó yene bonjεw nje fitele fi bó lese yî Klistu le. Keetefe bó nonen, ε Bitá mum kume bó εkumε saaka wvù jee wvu εkumε Jisos Klistu wvù kpwe ye bô mbuy we yî kpwe le noo nkawma we le wen nu ke ekase eto, nu fiε fi bó etaalè fwe ε bó ε gεε bvufee yî dvú le.

*Bikuu bi mwεem e ê nwa' wvun e*

1:1-2 Ken̄kewce

1:3-12 Keekume no Nyo' boysee bonyii

1:13-2:10 Ntefe εkumε keecee nce wvù yuule

2:11-4:19 No è nulo é wee Klistu ejoò bonjεw bò wvú yene

5:1-11 No è nulo é wee Klistu eshiwsè εkolε kew bvuu lemte ten fô bonyii le

5:12-14 Kemεse

<sup>1</sup> Nwa' wvun sanj me wvù Bitá waa ntum Jisos Klistu. ε me nsanj fô bonyii bò Nyo' nu ε caw le è nu bew e bò nu ε saan̄ken ε no nu biba bì Bontus bô Galεshia noo Kafadosia noo εsia noo Bitinia le. <sup>2</sup> Nyo' Icee wesebeene to caw ben no wvú to

---

**1:1** 2:11; Jem 1:1    **1:2** 2:9; Lum 8:29; Εfe 1:4; 2Tes 2:13; 2Bi 1:10; 1:19

seyseε wase ε è bæε lo ε fí nu ke enù. Ε Keyoy kew mum seyse ben gεε le ben eyuukè Jisos Klistu wvù nu ε cukε ben bô ελεμε kew e. Nyo' ebuw ben bô kembonεn naa ntay ebvuu enya ben bô mvuntelem mvù læεtene naa ntay.

*Beene cee taale kε wase ε è nu fwe*

<sup>3</sup> Mbense enù fô Nyo' le wvù nu Nyo' Tata we-sebeene wvù Jisos Klistu bvuu nu Ice. Wvù nu ε cam shen fô beene le baay, ε boo beene ê mboo wvu fwε le no Jisos Klistu to buyεε yí kpwe le. Fifi nu ε ge beene ε no cee keseen taale kε wase ε è nu fwe, <sup>4</sup> keeke edie bvushεw bvù wvù nu ε gεε ê beene wonj wvu we le. Bvushεw bvun nu bvù yaa nulo efo, kεnεε ebefe, kεnεε ekpwe ncom kε. <sup>5</sup> Nyo' gemgeme ben bô mvunḡay mwew fele yí fitele fi ben nu ε lese yí ye le ε no cεyte mboyma wvù nu ke eyenε diuu di fokemεse le. <sup>6</sup> No ben kee nonεn, ε mum ε no yuuke njonj. Geenεn ε ben keηke ke keeyuuke nsase yí kefew e caan nje mmom yì too fô ben e jé le jé le. <sup>7</sup> Yí too keemom laa fitele finεn fi ben lese yí Nyo' le tεmyi kε ntay ε. Kε naa ketwaa ke bigew e kè yεεle nu ε bó ké mom bô ηguy, ε ketwaa kin nu fiεε ε fí nulo ebefe, tu è nulo é bó emom kε tεn fitele fi ben lese yí Nyo' le. Ε fitele fin nu fiεε ε fí fele ketwaa ke bigew e kè yεεle. Nonεn, é ke edioo enu diuu di Jisos Klistu nu ke edunḡε εkolε kew, é bó ebensee ben, tumte monḡkum monεn, wvumte ben. <sup>8</sup> Keseen nu ε ben koonḡke Jisos Klistu ε ben ke baa cim yεn wase wvù le kε, ε ben ε lese fitele yí ye

le, yaa yene wvú le ke. Ben ε mum ε no yuuke njon naa wvu baay wvù è nulo wee saa esee ke, <sup>9</sup> njefo ben kee le no ben nu ε lese fitele yí ye le nu ε Nyo' nu ke eboyse ben. <sup>10</sup> Bonyii bo ntum Nyo' le bò to jemyi ekumε mbuwma wvù Nyo' to nu keeke ebuw ben dvú to nu ε no temte, gomte keekiεε ekumε mboyma wvun. <sup>11</sup> Keyoy ke Klistu le to nu yí bó le no bó to teete le Klistu nu ke eyen ηgew é ke edioo enu ejim jodvu, é wvú ekenke bvukuke. E bó mum no gomte keekiεε kefew kè mwεεm mvudvu nu ke ekooy, bò je yì mvú nu ke eghan se kooy jó le. <sup>12</sup> E Nyo' mum ge ε bó kiεε le mwεεm mvù bó to jemyi mvun nu ε bó yaa jemyi ε è nu fô bikuu bibole ke, le mvú nu fô ben e. E nu mvú mvù ben to yuweε dew bonyii bò to fewcεε saaka wvù jee wvù wvu Nyo' ê ben ê mvunγay mvu Keyoy ke Yuule kè Nyo' to ciinsεε ε kí to fowe le. Mvun nu mwεεm ε naa bonceendaa bo Nyo' le beele keekiεε mvú.

*Bonyii bo Nyo' le eyuulè yí gee dibole*

<sup>13</sup> No fí nu nonen, ben ekay bicaw binen enu ε ben ε seyse bvufee bvunen. Ben ekemsenè bó bikuu binen, taalè ke fwe ε è nu yí mbuwma wvù nu ke eto fô ben e seke Jisos Klistu ε kase ε dujce ekole kew e. <sup>14</sup> Ben eyuukè ke Nyo' le diewe boom bew e. Fo ben ebvuu egeè mwεεm bii nyam ye le no ben to shee gee seke ben to beε kenjiwe le ke. <sup>15</sup> Nyo' wvù to cawεε ben nu ε wvú yuule. Ben ten eyuulè yí gee dinen e dicii, <sup>16</sup> no fí nu ε bó ε san le, “Ben eyuulè njefo me n'yuule lo.”

---

**1:9** Lum 5:2; 6:22; Efε 1:14    **1:10** Luk 24:46; 1Kol 15:3-4; 2Bi 1:19-21    **1:12** Efε 3:9-10    **1:14** Lum 12:2; Efε 2:3; 4:17-18    **1:15** Lεw 19:2    **1:16** Lεw 11:44-45

17 No ben tenje Nyo' le Icee wene, ε wvú nu wee wvù saake wee tfuu yî gee diew e yaa dunjci kejeey jεey ke, tu ben kenjke keecee nce wene tfuu bô nfan wvù wvu Nyo' yî kefew e kecii kè ben nu yî wonj wvun e ke diewe botolo le. 18 Ke ben kee le Nyo' to nu ε sum wase ben yî nce wvu εcici wvù bo'icee bonen to kuuseε ben dvú, ε ke wvú to sum ε è nu bô fiεε diewe bigew e bì nulo ebefe ke. 19 Wvú to sum ε è nu bô ελεμε ke Klistu le kè yaa nu ke fiεε fi ncew, kè nu diewe ke waa njee kentanje le wvù yaa kenjke nlom kenεε fiεε fimew fi befe yî dvú le ke. 20 Nyo' to seyse wvú ε è beε lo ε wonj se ke kew, ε dunje wvú εdiuw yo fokemεse εyan e nje yene. 21 E ge Klistu ben ε se lese fitele yî Nyo' wvù to bvuseε wvú yî kpwe le nya wvú bô bvukuke le. No wvú ge nonen, mvuntelem mvunen bô bonjkwawce bonen ε mum ε no nu ε ben ε geε yî Nyo' le. 22 No ben yuuke keceey e, ε kí gee ε mvuntelem mvunen yuule wvu le ben ekenjke kenkonen fô boom bo bwee wene le ε è nu ke keceey, ben emum ekonènè ke nonen bô mvuntelem mvunen mvunciim. 23 Ben ekonènè nonen, njefo bó nu ε kase wase ε boo ben ê mboo wvu fwε le. Ke wee wvù boke ben wvun nu wvù nulo ekpwe ke. E nu Nyo' kebeε ε wvú yaa nulo ekpwe ke. Wvú to boke ben ε è nu bô diew ye yî nyaa nshii. E diew yin nu ke emey ke eleeme fó. 24 Fí nu no bó sanj ê Njwa' Nyo' le le,

---

**1:17** Yεsa 63:16; Yεli 3:19; Mat 6:9; 16:27; Lum 2:6; Jεm 2:1; 1Bi 4:5

**1:18** Mat 20:28; 1Kol 7:23; 6:20 **1:19** 1:1-2; Jon 1:29; Lem 20:28;

1Kol 5:7; Efe 1:7; Ibu 9:12 **1:20** Efe 1:4 **1:21** 5:1; Lum 5:2

**1:22** 2:17; 3:8; 4:8; Lum 12:9; Gal 6:10; 2Bi 1:7; 1Jon 4:11 **1:23**

Jon 1:13; Ibu 4:12; Jεm 1:18 **1:24** Yεsa 40:6-8; Jεm 1:10-11

“Wee wvu wum tfuu nu ke diewe egay e,  
 ε bvujonke bwew nu ke diewe fow e.  
 Egay ké no yowlene, ε fow ten yeete,  
<sup>25</sup> geenε ε diew Tata nu ke eleeme ke fó sekecii.”  
 Diew yidvu yin nu saaka wvù jee wvù wvu Nyo'  
 wvù bó to fewceε ê ben.

## 2

### *Ekumε Tε dì kenke nshii noo ketum kè yuule*

<sup>1</sup> Fí ε mum ε no nu le, ben ecinε mvuntelem  
 mvù befe le, ecinε kenleεma noo díew fiε le, ecinε  
 kendonke benεεn noo mvunεkunsen e. <sup>2</sup> Ben ekεnkè  
 shieε fô εmben yo ê keyoy e yò è nu diew Nyo'  
 εyinεyin e, ke lenlen no wan wvu caan ké no kenke  
 fô εmben e, wvu le yí egeè ε ben kuu gene fwe yí  
 mboyma wene le, <sup>3</sup> no ben nu ε yen wase le Tata  
 taale fô ben e. <sup>4</sup> Ben etoò fô Tata le wvù nu te ε dí  
 kenke nshii, ε bonyii to tun le ke dí jee ke, geenεn ε  
 Nyo' caw fiew le è nu di kenlum e fô wen e. <sup>5</sup> Ben  
 nu diewe eta yò kenke ten nshii le ε Nyo' bomte yew  
 Keyoy kew dvú, ε ben nu ηgoo bocee ncese bew bò  
 yuule, gee boncese bo ê keyoy e fô wvù le bò wvù  
 koonke nje Jisos Klistu. <sup>6</sup> Fí nu ê Nwa' Nyo' le le,  
 “Ben etaa eyen, me ηgeεle te ê kelaante kè Sayon e,

\*

ε è nu te di buu di yew e.  
 ε nu te ε è caw me, ε me ηkoonke dí baay.  
 Tε din nu ε ke wee lese fitele yí ye le é wvù ke  
 ewuumeη ke.”

**1:25** Yεsa 40:6-9

**2:1** Efe 4:25; Jεm 1:21; 4:11

**2:2** 1Kol 3:2

**2:3** Mben 34:8

**2:4** Mben 118:22; Yεsa 28:16

**2:5** 2:9; Lum

12:1; Efe 2:21-22

**2:6** Yεsa 28:16; Lum 9:33

\*

**2:6** Sayon nu

diee di kelaante kè Jelusalem e.

<sup>7</sup> Fô ben bò nu ε lese fitele yî ye le nu ε tε din jee fô ben e. Geenεn fô bonyii bò baa lese fitele yî ye le nu ε fí nu fô bó le no bó to saηεε ê Nwa' Nyo' le ε, “Tε didvu din di bonyii bo kembom e to tunεε nu ε nε wase ε tu di bó ebom naa ε è nu buu di yew e dvú.”

<sup>8</sup> Ε fí bvuu nu ε bó ε saη ε, “Tε din nu ke egee ε bonyii baytene yî dvú le. Ε nu kemaan ε kí nu ke egee ε bonyii gbwekene.” Bó baytene yî dvú le njefo bó nu ε tun keebēe diεw Nyo' le, ε è nu no Nyo' to seyseε wase ε fí nu ke enu. <sup>9</sup> Geenεn, ben nu finεn kfuu ε è caw Nyo' ben. Ben nu ηgoo bocee ncese bò lemte Nfon e. Ben nu ketum kē yuule, nu bonyii bò Nyo' nu ε ge ε è nu naa bew, ε ben esenè mwεεm mvù jee mvù wvú gee. Wvú nu ε tee ben, ben ε buy ê εjiwε le, ε ley ê n'yuu we wvu baay e. <sup>10</sup> Ε to nu fwele ε ben yaa nu bonyii kε, keseen ben ε no nu wase bonyii bo Nyo' le. Nyo' to baa cam shen fô ben e fwele kε, keseen nu ε wvú ε cam wase shen fô ben e.

*Bonyii bo Nyo' le eduηçi kenje kè jee enteleη jo bonyii bocii*

<sup>11</sup> Nsáa yεm shém, ben ekeè ε ben nu botolo yî nshε le fεn fele lo je. Me ε mum ε no nlooci ηkule lo can ê ben ε fo ben egeè mwεεm mvù nyam ye shieele kε, njefo mwεεm mvumvun diuu bô biyoy binεn. <sup>12</sup> Ben eduηçi kenje kè jee enteleη jo bonyii

---

**2:7** Mben 118:22; Mat 21:42; Lem 4:11      **2:8** Yεsa 8:14-15; Lum 9:33      **2:9** 1:2; Ksm 19:5-6; Lεw 19:2; Dito 4:20; 7:6; 14:2; Yεsa 9:1; 43:21; 61:6; Lem 26:18; Lum 5:17; 2Kol 4:6; Efe 5:8; Tay 2:14; Ibu 13:12; 1Bi 2:5; MwM 1:6; 20:4      **2:10** Os 2:23; Lum 9:25      **2:11** 1:1, 17; Mben 39:12; Lum 7:15, 17-23; Gal 5:17; Ibu 13:14      **2:12** Yεsa 10:3; Mat 5:16; 2Kol 5:10

bò yaa kee ke Nyo' wvu le é bó cim jemyi ekumε ben le ben befe lo, é bó eyenè kenje kenεn kè jee le, é ke edioo enu diuu dì Nyo' ε to, é bó etumte monkum mew.

<sup>13</sup> Ben eyuukè wee tfuu wvù bó nu ε gee le wvù esaakè bonyii le no ben nu bonyii bo Tata le. Ben eyuukè Nfon wvu Lum wvù nu Nfon wvu baay e, <sup>14</sup> eyuukè naa bonyii bò wvù nu ε gee le bó esaaké biba bi won e leese bonyii bò gee mwεεm mvù befe ηgew e bensee bò gee mwεεm mvu leη e. <sup>15</sup> Nyo' gomte le ben egeè mwεεm mvu leη, emum ebaanke dew biyuj bi bonyii le bò jemyi mwεεm ncεwncεw. <sup>16</sup> Ben eceè diεwe bonyii bò bó nu ε bvuse wase bó bvunfaw e, geenεn fo ben emum ejodò fifiε tεεke fojise gee bibefε ke. Ben eceè ε è nu diεwe bonfaw bo Nyo' le. <sup>17</sup> Ben ewvumtè bonyii bocii, koonkè boom bo bwee wene le bo mbee le bocii, fanè Nyo', wvumtè Nfon wvu Lum wvù nu Nfon wvu baay.

*Bonyii bo Nyo' le ejodò kenfewsεn yî ηgew Klistu le*

<sup>18</sup> Bonyii bò lemte bomew e, ben eyuukè bonyii bò ben nu ê bó ekuse le, wvumtè bó ntay. Fo ben eyuukè ke ε è nu bò nu nyεkeey taale fô ben e ke. Ben ewvumtè tεn bò befe kenje le. <sup>19</sup> Me njemyi nεn njefo Nyo' ké no yuuke njon bô wee wvù bó nyεwle bô wvù ε wvù yuuke nsase se wvù nu ε jay fiεε, geenεn kuule ke shém njefo wvù nu ε gee bvufee yî Nyo' le. <sup>20</sup> E bó suunke wee ε wvù ε jay fiεε, wvù ε no kuule shém, é sew wvudvu enu la? Geenεn, é wee yεne ηgew ε è nu yî fiεε fi jee le

---

**2:13** Lum 13:1-7; Tay 3:1    **2:15** 3:16    **2:16** 1Kol 6:11, 19-20; Gal 5:13    **2:17** 1:22; 3:16; Bηgn 24:21; Mat 22:21; Gal 6:10; Fili 2:12  
**2:18** Efε 5:21-6:9    **2:18** Efε 6:5-8    **2:19** 5:12    **2:20** 4:14

ε wvú ε ge, wvú ε no kuule shém, é Nyo' eyuuke njon bô wvú. <sup>21</sup> Ε nu bvudvuu bvunen keeyene ηγεω nonen, njefo Klistu ten to nu ε yen ηγεω nje yene, dunce kenfewsen ê ben le ben ejo ekale kew. <sup>22</sup> “Wvú to ke baa yuu ge naa lo kebefε κε, ε κε díεw fiεε to ké no ε yuu buy diuw we le κε.” <sup>23</sup> Seke bó to nan'yi wvú, wvú to baa tfuse κε. Ε bó dioo njinsene bô wvú, wvú saa sewci κε, geenen nya fiεε ficii ε è nu can Nyo' le wvú kee keesaw nsaw leη. <sup>24</sup> Wvú to nu ε tfuse bibefε bisεεbeene ε bí tu yî ye le yî kentam e. Wvú to ge nonen, wvu le beene ekpwe ê keba ke kebefε le, eceè nce wvu teytey. Bilente bì wvú to κεηκεε nu ε ge wase beene ε bonen. <sup>25</sup> Ben to shee njimte diεwε njée le, geenen keseen ben ε kase wase ε to fô Wee wvú Cεyte bvuu Taale fô biyoy binen e.

### 3

#### *No kpwoon bô diemsen nulo ecee*

<sup>1</sup> Boke' bo bonyii le, ben ten eyuukè bole' bonen e. Ε ben gee nonen, ε wee mvu bó le nu ε wvú tune keebee diεw Nyo' le, é wvú ke enε ebee ε wee baa cim jeme diεw ê wvú κε, ε è ge kenje ke kpwεse le, <sup>2</sup> no wvú yene ε wvú wvumte ekole kew, cee nce wvú yuule. <sup>3</sup> Fo fiεε fi dunçi bvujonke bvunen enù mwεεm mvu ye le diεwε keeseysel yvuw ekole ε yî jee, bô keejiise biεε, noo keesuute ye bô ndvú yî jee

---

**2:21** Mat 16:24; 20:26-28; Jon 13:15; Lum 15:5    **2:22** Yεsa 53:9; Jon 8:46; Ibu 4:15    **2:23** 3:9; Yεsa 53:7; Mat 26:55-56, 67; 27:14, 27-31    **2:24** Yεsa 53:4-5; Lum 6:2, 11; Kolo 2:14; Ibu 9:28    **2:25** Yεsa 53:5-6; Εsek 34:5-6; Mat 9:36; Jon 10:16; Ibu 13:20    **3:1** 1Kol 7:16; Εfe 5:22-24    **3:3** 1Tim 2:9



ke. <sup>4</sup> Fiεε fi edunçi bvujonke bvú wee le enù fiεε fi wee nu fô fitele fiew e, ε è nu fitele fi bonene nu nyεkeey. Ke bvun bvujonke ke yvumen ke, ε è nu bvù Nyo' koonke ntay. <sup>5</sup> E nεε no bokεε bò yuule bo fwele bò to nu ε gεε bvufee bvubole yî Nyo' le to ké no dunçi bvubole bvujonke. Bó to yuuke ten bole' bobole. <sup>6</sup> Wee diεwε Sela le to yuuke Abla'am e tenje wvú le tata wen. Ben ten nu boom bo Sela le fen é ben gee mwεεm mvu len yaa fane fiεε ke.

<sup>7</sup> Bolemsε, ben ten ekiεε je yî ben kenke keecee ben ε bokε' bonen jó. Ben enyaà n'wvum ê bó no bó baa kenke mvungay diεwε ben e ke. Nyo' nu ε buw ben ε bó bocii bó nshii wvù mεy lo. Ben eceè nonen, wvu le fô fiεε ebaanke bunle yene ke.

<sup>8</sup> Keemεεse, me ε no nteete ben bocii le, ben ekεnkè fitele fimwaan, kenkè shen fô bonyii le, kenkè kenkonen ke bonyii bo mbee le, kenkè mvuntelem mvù jee, ε wee yaa joo ke wee mvu ekuse ke.

<sup>9</sup> Fo wee é ge kebefε bò wee, é wvú tfuse bò kebefε ke. E wee nan wee, fo wvú etfuse bò ncun ke, ε wvú tfuse ε è nu bò diεw kembonen. Fin nu fiεε fi Nyo' tenje ben le ben egeè é wen ke elan kembonen yî yene le. <sup>10</sup> E nu no bó nu ε san le,

“E wee koonke keeyuw njon yî nshii we le,  
bò keeyen ediuw yò jee le,

é wvú no kemsene bò leme diew,  
ε diεw fiεε yaa buyte diuw we le ke.

<sup>11</sup> Wvú kenke keebanke jim ê mwεεm mvù befe le,  
egeè ε è nu mvù jee, ekunenè nyεkeey biì dvú le,

**12** njefo Tata Nyo' ké no yene bonyii bo teytoy e yuuke bunle yibo.

Geenen ε Nyo' ε bon jise yî bonyii bò gee bibefe le.”

**13** ε ben keŋke shiee wvu baay keegee mwεem mvù jee nonen, tu wee wvù nulo ebvuu ege fiε fi befe bô ben nu yeε? **14** Geenen, é bonyii cim nyaa lo ηgew ê ben njefo ben gee mwεem mvu teytoy, tu Nyo' nu ke elan kemonen yî yene le. “Fo ben efanè bó, keεε fo mvuntelem ebuukè ben ke.” **15** Ben ewvumtè ε è nu Klistu ê mvuntelem mvunen e diεwε Tata wene le. Ben eseyse bikuu binen, ecεytè keenya ntfuse ê wee wvù nu ebife fiε fi ben taale fwe yî dvù le. Geenen ben dioo tfuuse, no tfuuse nyεkeey bô n'wvum. **16** Fo ben egeè fiε fi nelo esaake ben fô fitele le ke, wvu le é bó nan'yi ben, jemyi díεw yì befe ekumε keŋge kenen kè jee nje ben nu bonyii bo Klistu le, é bó ewuumene. **17** Ben ekeè le fí jee keeyen ηgew nje fiε fi jee fi ben ge ε è fen nu le Nyo' kooŋke le fí enù nonen, efey keeyen ηgew yî fiε fi befe le fi ben ge. **18** ε nu ke ten no Klistu to yenεε ηgew kpwe. Wvù to kpwe nje bibefe bi bonyii le kan mwaan ε fí ka lo nonen. Wvù wvù to nu wee wvu teytoy to nu ε kpwe fô bonyii bò yaa nu ke teytoy e keeto bô beene fô Nyo' le. Bó to nu ε yu wvù ε è kpwe nyam ye, geenεε Nyo' ge ε wvù no nu dvù ê keyoy e. **19** ε nu ê keyoy kin e wvù wvù to γενεε fewcε diεw Nyo' ê biyoy bì nu yew ncaw e. **20** Biyoy bin nu bì to baa bee Nyo' le kefew ke Noa' le ke. Nyo' to nu ε bosen

---

**3:13** Lum 13:3    **3:14** 4:14; Mat 5:10    **3:15** 1:3-5; Kolo 4:6  
**3:16** 2:15    **3:18** 2:21; Lum 5:6-8; 6:10; Ibu 4:15; 7:27    **3:19**  
 Kej 6:2; 2Bi 2:4; Jut 6    **3:20** Kej 6:14-22

kuu shém bô bí, cey seke Noa' to keenci nguww. Nguwwun nu ε bonyii to ley jó ke wee nyan maan, ε ε nu bó bô to boyεε can joo le. <sup>21</sup> Joo yidvu yin nu diεwε joo yì bó leese bonyii jó keseen ε yì boysee bó bô mvunḡay mvù Jisos Klistu to buyεε dvú yî kpwe le. Ke bó leese wee ê joo le bó cuke ε è nu yile yî ye le ke. E nu keelεke Nyo' bô fitele fî yuule. <sup>22</sup> Jisos Klistu wvun to nu ε ben fowe, shii ê εbo ke εεεy ke Nyo' le, ε no nu fó saake bonceendaa bo Nyo' le bô biyoy bì keḡke mvunḡay noo bì saake bicii.

## 4

### *Nce bonyii bo Nyo' le nu wvu fwε*

<sup>1</sup> No Klistu to nu ε yen ḡεw yî nyam ye le, ben ten ekeḡkè kfuu fifiε fitele fî wvú to keḡke keeyen ten ḡεw, ekumyì le wee wvù nu ε yen wase ḡεw yî nyam ye le nu ε bô kebefε ε ka wase. <sup>2</sup> Nonen, ke wvú beε ebvuu eceè nce we fokuse fen bii mwεεm mvù nyam ye gomte le ke. Wvù nu eceè bii wase ε è nu mwεεm mvù Nyo' gomte le. <sup>3</sup> Ben ekeè le kefew kè ben to shee gee mwεεm diεwε bonyii bô yaa kee ke Nyo' le nu ε kí ε fey wase. Ben to cee nce nnyen kenjan, bii ye yene yì ḡeyte le, wuu mbvuum ε mó koole, gee bonḡkaw diekene, wukene yole fó gee diεwε bwé le. E ben to bvuu bunlee ten bonyo' bo εcici, ε Nyo' to tun wase. <sup>4</sup> Keseen diuw ε no yumte bonyii bô yaa kee ke Nyo' no ben baa bvuu taashi ḡgoo ben ε bó yî nce wvun wvù nu diεwε wvu nyám e, bó mum ε banke ye ε no nan'yi ben. <sup>5</sup> Geenεn, bó

---

**3:21** Lum 6:3-4; Ibu 10:22      **3:22** Lem 1:9; Efe 1:21; Mat 22:44;  
Lum 8:34; Lem 2:33      **4:1** 2:24; 2Kol 4:10; Gal 5:24      **4:2** 2:21  
**4:3** Gal 5:19-21; Efe 2:3; Tay 3:3      **4:5** 1:17; 2Tim 4:1

nu ke eleem etaŋe diuw fwe dvu Nyo' wvù ceyte keesaw bonyii bò bæε dvú bô bò kpwekεn wase le. <sup>6</sup> Ε nu fiεε fi to gee é bó se fewcε tεn saaka wvù jee wvù wvu Nyo' ê bonyii bò nu ε kpwekεn wase. Bó to fewci nonεn wvu le no bó nu ε bó to cim saw wase bó yî nyam ye le diεwε bonyii bo boyuum e, é bó eceè kε nce wvu ê keyoy e ε wvú nu diεwε no Nyo' cee.

*Wee elemtè bô nnya ye ê je yì jee le*

<sup>7</sup> Ben ekeè le kefew kè fiεε ficii nu ke eka too wase nceencee. Nonεn, ben enù kε bô bvufee bvunεn fô, kemsenè bô bikuu binεn, wvu le ben ebunleè. <sup>8</sup> Fiεε fi fele mwεεm mvunciim nu kε le wee ekoonkè waa bwee bô fitele fiew ficii njefo kenkonεn ké no banji bibefe nteen. <sup>9</sup> Ε waa bwee wee la ghane ê wvú le, é wvú fiisen wvú, taa fô wvú le yaa wvukene kε. <sup>10</sup> No ben nu ε Nyo' ε buw ben bô nnya jεy jεy, wee ejòè ye nnya lemte dvú fô bonyii bomew e. Ben elemtè bô mbuwma wvun wvù Nyo' nya jé le jé le diεwε bonyii bo lemme le bò jee. <sup>11</sup> Ε wee fewci diεw Nyo', é wvú no fewcì kε ε è nu diεw yì buy diuw Nyo' le. Wee é no lemte fô bonyii bomew e, é wvú no lemtè kε ε è nu bô mvunγay mvù Nyo' nya ê wvú le. Ben egeè nonεn wvu le yî fiεε ficii fi ben gee le, é mbense egeè fô Nyo' le fele yî jisos Klistu le. Bvukuke bô mvunγay mvunciim nu ε è kenke wvú sekecii se ŋka. Fí enù nonεn.

*Keeyene ηγεw diεwε bonyii bo Klistu le*

---

**4:7** 1Kol 10:11; 1Tes 5:5-8; 1Jon 2:18    **4:8** 1:22; Jεm 5:20    **4:9** Ibu 13:2    **4:10** Lum 12:6-8    **4:11** Lum 12:7; 1Kol 10:31; 12:8; Jεm 3:1

12 Nsáa yem shém, fo ben ekeŋke nghanw yî nton'ye wvù ben yuuke ye le wvù too fô ben e keemom ben ke. Fo fí enù ke diewε è nu fiεε fimew fifε ε fí kooyi bô ben ke. 13 Ben elanlanjê lo ε ben yene nghanw diewε no Klistu to yenεε wvu le é ke edioo enu seke wvù ε buynen bô bvukukε bwew, é ben ebvuu elanlanjê, yuuke njon. 14 E bonyii nan'yi ben nje diee dí Klistu le, tu njon wvu baay nu wene. Fifin duŋci ε Keyoy ke bvukukε le kè è nu Keyoy ke Nyo' le nu yî yene le. 15 E wee yene nghanw, fo wvù eyenè njefo wvù nu ε yu wee, kenεε le wvù nu ε con fiεε kenεε ε ge fiεε fimew fi befe, kenεε le wvù nu ε lese diuw fô mwεεm mvu bonyii bomew e ke. 16 Geenεn, é wee yene nghanw njefo bó teŋe wvù le wee Klistu, fo wvù ewuumenè ke. E wvù no bensee ε è nu Nyo' le wen keŋke didie diee. 17 Ben egeè nonεn njefo kefew nu ε to wase kè Nyo' nu esaw bonyii, ε wvù nu keεw ε è nu bô yew ye. E wvù keεw ε è nu bô beene nonεn, é fí ke enu nεε bô bonyii bò nu ε tun keebē saaka wvù jee wvù wvu Nyo' le? 18 Bó nu ε san ê Nwa' Nyo' le ε,

“E fí tεmyi fô wee wvu teytey e keeboy,

é fí ke enu nεε bô wee wvù tune Nyo', gee bibefε le?”

19 Nonεn, bonyii bò yene nghanw no Nyo' gomte le bó eyenè, egeè mwεεm ε è nu mvu leŋ, geelè bikuu bibole can Nyo' Mbom e wvù ké no leeme ke yî nkanwma we le.

---

4:12 1:7    4:13 5:1; 2Kol 4:10; Lum 5:2    4:14 2:20; 3:14; Mat 5:10-12; Mak 13:11; Lem 7:55    4:16 2Tim 1:8    4:17 Yeli 25:29; Esek 9:6; 2Tes 1:8    4:18 Bnɔgn 11:31    4:19 Mben 31:5

## 5

*Ekumε njée Nyo'*

<sup>1</sup> Me ε mum ε no ηgomte keentefe bocee kentaashε ke bonyii bo mbee le ê ben enteleη. Me nu wee ê ηgoo bocee kentaashε le, ε me nto n'yen bô ejise yem no Klistu to yeneε ηgew, ε me nu ten wee wvù nu ke eley bvukuke bvù wvù nu ke eto dvù le.

<sup>2</sup> Me ε no nteete ε, ben etaalè fô njée Nyo' yì bó nu ε gεε can yene le ntay. Fo ben dioo taale, no taale ke diewe bó kane lo ben ke. Ben etaalè bô ηkon no Nyo' gomte. Fo ben etaalè keηke ken'yεε ejise yì bigew e ke. Ben ekeηkè shiee ε è nu yì lemme le.

<sup>3</sup> Fo ben envuwseè njée Nyo' yì bó nu ε gεε ben ê we jodvu ke. Ben eduηci ε è nu keηge kè jee kè yì eyenè beηene. <sup>4</sup> E ben gee nonen, é Ekole ke Bonceynjee le ke dioo ε buynen, é ben ekeηke kefo ke bvukuke le kè yaa ké kpwe ncom ke.

<sup>5</sup> Me ε no njemyi ten ê keghan le, ben eyuukè bocee kentaashε ke bonyii bo mbee le ntay. Wee tfuu eshiwsè ekole kew ê waa bwee fwe sekeci. Ben ekeè ε, “Kε Nyo' ké no tomte wee wvù bensee ye ke. Wvù ké no tomte ε è nu wvù shiwse ekole kew bô mbuwma we.” <sup>6</sup> Ben emum eshike bikuu binen enù ê mvungay mvu Nyo' le kuse, é kefew ke dioo ε kocen, é wvù ebense ben. <sup>7</sup> Ben egεε mwεem mvunciim mvù jewsee ben can ye le, njefo wvù keηke shiee wene. <sup>8</sup> Ben ekemsenè bô bikuu binen, ejinyì ntay njefo wee wene bvuban wvù dεwle

---

**5:1** 1:21    **5:2** Jon 21:15-17; Lem 20:28; 1Tim 6:5    **5:3** 2Kol 1:24; Fili 3:17; Tay 2:7    **5:4** 1Kol 9:24-25; 1Bi 1:4    **5:5** Bηgn 3:34; 29:23; Efe 5:21; Jεm 4:6    **5:6** Jεm 4:10    **5:7** Mben 55:22; Mat 6:25-30; Fili 4:6    **5:8** Mben 22:13; 1Tes 5:5-8

ghane wεentene diεwε bvule wvù fεwte le, gomte wee keenjele. <sup>9</sup> Ben ebon ηαη bô wvú, lese κε ε è nu fitele yî Nyo' le é fí etεme, ekumyì le boom bo bwee wene le ye ne κε ten ηγεw nonεn won tfuu. <sup>10</sup> Nγεw wvun nu κε yî kefew e caan, é Nyo' emum ekase eseysel mWεEM é mvú ejon fô ben e, enya ben bô mvunγay, ege é ben eciim ntay. Nyo' nu wvù nyaa mbuwma tfuu ê bonyii. Wvú nu ε tee ben keeley bvukukε bwew bvù mεy lo le nje ben nu bonyii bo Klistu le. <sup>11</sup> Mvunγay mvunciim nu ε è κεηke wvú sekecii se ηka. Fí enù nonεn.

### *Ngayma*

<sup>12</sup> Me nsan fiηwa' fin fô ben e ε è fici Silas \* me wvù nu waa bwee wesebeene. No me n'ye ne nu ε wvú nu wee wvù è nulo é wee egeε bvufee yî ye le. Me nsan keentefe ben, embvuu enge é ben ekiεε le fiεε ficii fi me nsan duñci keceεy ke ekumε mbuwma Nyo'. Ben eleemè yî dvú le temyi ntay. <sup>13</sup> Kentaashε ke boom bo bwee wesebeene le ke Babilon kè Nyo' nu ε caw gayte ben e. Mak wvù waa wεm yî mbee le gayte ten ben e. <sup>14</sup> Ben egayne bikuu binεn e, ηηocε yî κεηκοηεn e. Kembonεn enù fô ben e bocii bô nu ε taashε bô bo Klistu.

---

**5:9** Efε 6:11-12; Jεm 4:7    **5:10** 1Tεs 2:12    **5:12** 1Tεs 1:1    \* **5:12**  
 Diee din nu ten le «Silvanus.»    **5:13** Flm 24    **5:14** Lum 16:16;  
 2Kol 13:11

**N'wa' Nyo' Monkan mo Monfem  
New Testament in Noone (CM:nhu:Noone)**

copyright © 2011 Wycliffe Bible Translators, Inc.

Language: Noone

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Noone

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---



PDF generated using Haiola and XeLaTeX on 21 Feb 2024 from source files  
dated 29 Jan 2022  
5b12a3f8-7a2a-5b6f-b1da-1bf94b13fc2e